

464843





黃

氏

世

德

傳

贊






光緒庚寅冬鑄

雷書種閣藏板





黃氏世德傳贊敘



寒家舊居竹橋自曾祖管村公徙北城官家術星霜百六十

周矣憶炳幼時先君子每攜至竹浦瞻謁宗祠禮畢歸棹浪

靜風平歷溯中筵各神位諄諄示曰某公忠某公義某公孝

悌某公節廉某公名宦某公儒林皆後人所當則倣者也炳

謹志之不敢忘蓋吾族支分七段祠列三筵凡德位清高品

尊學博與出身科第者皆得列位中筵春秋享祀餘則分段

依次列座兩旁於此見七世之廟可以觀德之遺意焉惟是

萬二公後冢嗣中斷且僑居異籍者不乏其人嗟緜椒衍宗



子莫稽而我李塔一支自小雷公萬里尋兄後忠端遺獻為

六七傳宗子友悌忠孝一脈相承遺獻以來炳為七葉宗子

而荏苒光陰不克有所樹立以自見於世不誠負先君子之

訓示哉繇是深自警懼夙夜孜孜於先人之遺緒略窺一二

幸不至流為不肖之歸同治庚午大比寶興炳偕瀚兒蝨乎

其間是皆先人德澤之深厚教澤之涵濡有以陶成之也戊

子九月瞿子玖學使奏舉兩浙學行兼優耆儒四人忝列

炳名旋奉硃批賞加內閣中書銜明年己丑

今上親政恭遇覃恩援例請以恩賞職銜



贈先考妣并

馳贈王考妣時吏部方擬題請改賞陞銜

而準給封典之

旨早降內閣故仍以內閣中書銜

贈二代亦不更換陞銜矣是歲之冬

龍章寵錫下逮衡

茅於是重新栗主升祔中筵禮儀既成思慕靡罄爰取崇祀

中龕諸公考其事實加以贊詞計神位五十有九傳贊四十

有一不敢爲艱深古奧之語俾閱者便於諷詠至於標題詳

略悉本神牌稱謂不同均仍舊傳昭敬慎也書既成族人擬

捐貲付梓

炳

曰余於宗祠忝爲宗士於小雷公後世爲宗子

於忠端公下長一宗矣則凡揚前徽而闡先德表遺築以示



後人皆分內事也何敢糜公費而煩宗人耶爰以己貲授諸

嗣氏並錄先世 誥敕於卷中使仰企先型者并知

天恩之廣厚云爾

光緒十有六年歲在庚寅十月既望二十三世孫炳厘謹敘

目錄

圖說 圖一 說一

傳贊 四十一首

誥敕 十一道

附錄 記一篇

附錄 記一篇



# 竹橋黃宗祠 中筵神位圖

左次  
中序

九位

鍾一位

宋始祖考 鶴山萬二府君

廿七世	清贈內閣中書淨齋公	諱徵謀	李
廿六世	清進士從化知縣鶴石公	諱徵父	李
廿五世	清舉人泮陽知縣大俞公	諱璋	李
廿四世	清贈從化知縣管村公	諱武萬	李
廿三世	清旌表孝子心書公	諱邦輝	古
廿二世	清欽賜翰林院檢討東崖公	諱岱	白
廿一世	清順天舉人摺颺公	諱虞俊	前
廿世	清進士河南督學紫臨公	諱軒	前
廿九世	明鄉貢進士澤望公	諱宗會	李
廿八世	清欽徵遺獻明副都御史文孝公	諱宗義	李
廿七世	明進士工部觀政鳳署公	諱球	白
廿六世	明貢元宜興知縣後川公	諱夔	周
廿五世	明王門弟子丁山公	諱元釜	古
廿四世	明進士欽州知州鶴谿公	諱嘉愛	古
廿三世	明詩人半山公	諱嘉仁	古
廿二世	明舉人建甯教授蟄菴公	諱伯川	周
廿一世	明進士提學僉事道南公	諱韶	古
廿世	元定海都元帥德澤公	諱澤	白
廿九世	元進士浙江宣司德彰公	諱彰	白
廿八世	元進士餘姚州判茂卿公	諱茂	白
廿七世	鍾一位		



宋始祖妣林氏伯七孺人

神位

在

二世亞五公  
三世從一公  
三世從六公  
四世曾一公  
五世桂一公  
五世辛三公  
六世端七公  
六世端六公  
六世端三公

序中  
表右

卷中各傳標題悉本  
神牌詳書職銜茲圖  
因幅隘不便備載爵  
秩僅舉大略而已

中區話一

七世	明北直御史菊源公諱均保石
八世	元鄆縣教諭德順公諱順白
八世	元儒林菊東公諱珏前
十世	明藝苑名士菊泉公諱翊古
十世	明萬里尋兄孝友小雷公諱璽李
十世	明舉人金谿知縣履齋公諱嘉會古
十世	明進士及第南浦公諱堂周
十世	明舉人景州知州醒泉公諱尙質泉
十世	明封太僕卿鯤溟公諱曰中李
十世	明進士山東道御史忠端公諱尊素李
十世	明儒林廩膳生晦木公諱宗炎李
十世	明儒林邑庠生道傳公諱宗裔周
十世	清纂修明史主一公諱百家李
十世	清進士慈利知縣箭南公諱嶽白
十世	清旌表孝子雁嶼公諱兆溥古
十世	清考授州同泰安分縣諤哉公諱千人李
十世	清馳贈內閣中書拱圖公諱璧李
十世	清副貢太平教諭雨莊公諱徵肅李
十世	清歲貢海州州判菊圃公諱徵質李



吾族規範。州判茂卿公創於前。蟄菴鯤溟諸公定於後。至  
遺獻文孝公宗祠中筵祀議法良意美。尤當遵行弗替者  
矣。議曰宗祠崇祀中筵首尊開創次及支祖。若夫孝友性  
成。忠貞誼篤。懿跡昭彰。芳徽彪炳。則德行之選也。抑或身  
膺民社。惠澤汪洋。清慎譽隆。去思碑矗。則名宦之儔也。更  
有學貫天人。識超儔類。著述滿家。泉石高蹈。則儒林之望  
也。凡如是者。悉宜崇祀。他如仕宦取乎正途。若異途而登  
仕籍者。雖職居守令。不得列於斯龕也。科名重夫鄉會。凡  
名題桂榜者。卽不沾一命。亦得與於此筵。若恩歲諸貢。未



登仕版者不與焉。至於子孫貴顯荷

恩綽而稱封翁。

亦必取其品望素優。澤躬儒雅。道藝可稱者。方得儕於茲席。故自勝朝至今。凡榮膺 贈典。謙讓而處旁筵者。比

比焉。大凡地位相宜。則居之者安。神與人無二理也。苟所處非所宜。雖子孫欲顯其祖父。而遂以招人之指摘。則榮之適以辱之。豈孝子慈孫而忍出此耶。遺獻之議如此。今觀始祖以來。年逾七百。世計廿餘。而中筵神牌。僅五十餘位之數。不可見祖宗其難其慎之心哉。凡我後人所當謹體先人用意之深遠。而永守其遺法也已。庚寅人日敬錄。



竹橋黃氏世德傳贊

裔孫 炳屋 輯著

宋始祖考鶴山萬二府君

遺獻黎洲公家錄云。安定公諱萬河。字時通。別號鶴山。其先金華人也。安定公之父。判慶元府事。建炎四年。金人犯慶元。守臣劉洪道走。通判公曰。奈何去社稷也。遂死其城。義考通判公名諱不可得。宋史載炎興間事。漏逸者半。徐夢莘所作北盟會編。差詳亦無聞焉。元州判公茂卿去之八世矣。載其事於譜。此必故老之所傳也。然則忠節之士。湮沒於亂離者。



多矣。於是通判公有三男子。分地避兵。一走定海。一走吳興。一走慈谿之竹墩。走竹墩者。則安定公也。已而徙餘姚。其地竹橋。去竹墩三十里而近。安定公之稱安定也。相傳莫知所自。乃余從故老。得官印安定郡記。安定郡。陝西路之涇州也。當公之時。已沒於胡。而僑寄其名於彼。何哉。慶元今甯波府

贊 通判殉國諱字莫詳安定振跡屏蔽海疆

曰 颺縣椒衍甲於諸黃衣冠濟楚百代烝嘗

宋始祖妣林氏伯七孺人

泉水醒泉公譜傳云。始祖萬二府君。諱萬河。字時通。宋通判。



應春公次子。娶慈谿林伯七孺人生八子二女。均以亞爲行。次長子亞一。早亡。亞二亞八女也。萬二公才識宏遠。深諳韜略。有文武材。從南渡。扈蹕至徽州。遷慈谿之竹墩。仕爲餘姚州從事。通判。受命簡兵守官埭。屯竹橋。以保境內。公父以淮兵沒於金。公憤然欲起報仇。林母止之曰。長平之事。輕敵致之也。方今金兵正熾。而欲以單師抗之。是自投虎口。無益也。不如靜守以俟。公乃召募壯士。練習民兵。日夜警備。防禦盜賊。以亞五亞六護持左右。同居竹橋。亞三亞四亞七居古路。以防戰梁橋港。亞九亞十居泉水。以防四明陸路。七子俱有



將略公調度合宜。寇盜莫之敢近。至孝宗朝。朝野無事。公謝兵相。其地皆沃土。令七子各治產爲世業。而公與孺人就養焉。至今三族並盛。冠裳濟美。蓋由公創業之宏。亦由孺人輔助之力也。

炳屋謹案。遺獻公博極羣書。考通判公名諱。不可得。泉水譜傳。應春二字。果何本耶。竹橋宗譜云。此文未知真贋。誠疑之也。

贊 一族母儀千秋闔式觀。變知幾女中卓識。

曰 七子分居三村築室麟趾振。振馨香罔極。



二世祖亞三府君 亞五府君 亞六府君 三世祖從一

府君 從二府君 從六府君 四世祖元二府君 曾

一府君 曾二府君 五世祖桂一府君 辛六府君

辛十三府君 辛十五府君

我族自始祖後亞從曾辛四世諱字莫稽僅存行次向謂兵

燹之後譜牒無存遂致缺失炳讀俞曲園太史春在堂隨筆

云元制庶民無職者不許取名止以行第及父母年齒合計

為名證以明高皇所稱其兄之名正是如此又考洪文敏夷

堅志所載宋時雜事如熊二劉十二周三隗六之類不勝枚



黃氏世德傳卷三  
舉又載陽武四將軍事云。不曾詢其姓第。言姓第不言姓名。蓋宋時里巷之民固無名也。然則我族二世以下之無名。非譜牒散佚之故矣。

贊 自宋迄元歷數百年諱字莫考行事無傳

曰 韜光畎畝晦跡市廛佑啟我後遺澤縣縣

六世祖白鶴橋端七府君 石柱端八府君 前園端十四

府君 李家塔端廿二府君 周家埠端十六府君

我竹橋黃氏自亞五公後歷四傳至端七公分支白鶴橋端

八公二子福三公分支石柱頭仁九公分支後新屋端十四



公分支前園端廿二公二子仁六公分支李家塔仁十公分支畷頭橋亞六公後歷四傳至端十六公分支周家埠自後瓜颺繇繇衣冠濟濟爲東南望族矣

贊 積厚光流波清源濬種德累仁必有餘慶

曰 一脈榮敷七支輝映譬彼豫章根深葉盛

元餘姚州州判泰定甲子進士茂卿先生

諱茂 白鶴橋支七世

府君諱茂字茂卿始祖萬二府君七世孫也生而明敏容貌偉然讀書善辯說厭世俗之見往撫州從學於吳草廬毅然以道自任邑之秀民賢士大夫之子弟爭執經門下願託弟



子籍。府君每令其靜坐數日。然後就講。成材者甚眾。府君屢試有司。不利。至晚年。登泰定甲子進士第。授餘姚州州判。府君曰。道可以及民矣。何必官大為哉。日未出冠帶坐堂上。召諸父老。授以條教。而督勸之一。發言未嘗不以人倫為本。孝悌為先。愛民下士。百姓懷之。娶嚴四夫人。次陸氏。順太君。皆無所出。妾方氏。生三子。並登仕籍。至元六年。府君卒於家。年八十有二。壬午冬十一月。與嚴四夫人合葬於太白浦之原。府君事狀。聞諸虞邵菴云。家錄

贊 師能淑身何嫌途遠道可及民何須官顯





曰 日坐堂皇條教勸勉正己化人功歸實踐

明北直道監察御史菊源府君

諱均保石柱支七世

家錄云御史公諱均保號菊源安定公七世孫也洪武二十

三年貢士天子親詔策之閩人劉駟第一公第二授北平道

監察御史上便宜十二事稱旨已有傳檄北平者公辨其偽

捕斬之天子以為能

原註主一公云菊源公後被宋中田炳文之讒謫戍山西安東衛

炳廬謹案進士題名碑貢舉考略二書並載洪武二十三

年庚午歲舉行鄉試二十四年辛未歲舉行會試會狀黃

觀榜姓許榜眼張顯宗探花吳言信是科中式止三十一



人並無劉駟及菊源公之名。卽查前後數科內亦無其人。家錄所云不知何本。或者天子特旨召試而第其高下未可知也。

贊 萬言對策立論錚錚烏臺執簡鼇首分榮

曰 識精辨偽帝許爲能縱遭讒毀明德常馨

元浙江宣司至順庚午進士德彰府君諱彰 鄞縣儒學教

諭德順府君諱順 鎮守定海都元帥德澤府君諱澤 鶴

橋支  
八世

家錄云茂卿公生三子。曰彰順澤。延師於寺。離室家以誨之。



務欲其去邪遠色。專心致志。其附近有化安永樂二寺。皆捨田山於僧。永爲子孫藏修遊息之資。至順辛未春。茂卿公力求致仕。每曰。天下將亂。武不可廢也。遂教幼子以武。長子彰。登至順庚午進士。任浙江宣司。次子順。以制舉任鄞縣教諭。幼子澤。以武舉任副元帥。鎮守定海。有功。勅封都元帥。蓋茂卿公善於貽謀。三子克繼父志。洵可爲一族所取則也歟。

贊 名高蕊榜。宣撫是司。鄞山秉鐸。多士師資。

曰 海疆專闡禦亂扶危。玉昆金友百世芳徽。

元儒林菊東先生

諱

珏字思明

前園支八世



先生諱珏字思明。一字玉合安定公八世孫也。通志傳曰：初學春

秋後見四明黃產實說尚書心好之。更受尚書。隱居教授。浙

之言尚書者多宗事之。喜玩邵子皇極經世書。旨趣精妙。貫

徹天人。有以自樂。明一統志有傳公蓋元末明初人續錄仲簡公註嘉隆間人誤

贊 磨史筆削袞鉞交施尚書義理剖析精微

曰 天人貫澈化及一時隱居自樂百世經師

明江西提學僉事成化己丑會魁道南府君。諱韶古路支十世

道南公諱韶字九成。安定公十世孫也。初為小吏。給事於藩

司。藩司嘗夜出。聞吏舍讀書聲甚苦。問之。乃公也。試以經義。



奇之值天順己卯鄉試藩司引入試院以禮記中式成化五年登進士第授南大理寺左評事歷左寺副右寺正陞江西按察司僉事署學使者事請謁不行公知見忌於世遂致仕嘗賦其所居之山水曰道南八景詩一時名士如華亭張弼東吳桑悅皆從而和之

家錄

贊 貧不廢學書聲琅琅達不忘廉介節堂堂

曰 游升要職志潔行芳徜徉山水風雅頡頏

明藝苑名士菊泉府君 諱 翊 字 九霄 古路支

菊泉府君諱翊字九霄能為五七言詩書法趙松雪畫竹石



菊花而菊花尤入神品。菊泉傳醒泉，醒泉傳楊秉和，秉和傳僧海懷。此其畫菊之源流也。菊泉子之畫菊，引泉爲池，種菊數百本，池上朝夕嘯詠於側。時其烟容傲色，斂之尺幅，遂自號菊泉子。其視人世榮利之事，嗤斥不啻灰塵矣。成化十六年，覲其兄道南於留都。留都士大夫聞其名，爭挽致之。遇其意所不樂，斷梗孤蘂，絕不可得。雪湖馮蘭以詩名，其詠菊泉也曰：種菊雁山下，山深泉亦長。傲霜秋已老，映月夜猶涼。妙灑臨池墨，清分獻酒觴。蕭然三畝宅，風景卽南陽。今菊泉故地蕪穢不治，而樵兒牧豎過猶指之曰：菊泉子嘗種菊於此。



矣子鶴溪半山

家錄

贊 灑墨揮毫唯意所命斷幅零箋擇人而贈

曰 意所不合求無一應人世紛華掃除絕淨


明建甯府教授主試陝西壬午順天鄉進士螯菴府君

諱伯

川 周家埠支

十世

螯菴公諱伯川字德洪安定公十世孫也公嘗為蒙師教授吳中有大姓聘兩師於家塾一經師一蒙師蒙師則公也大姓有重客置酒高會召經師獨不召蒙師公恥之即日辭大姓而歸乃從他經師復為弟子天順壬午舉於鄉明年會試





試日大火舉人焚死者九十餘人而守軍負公得出公乃喟然歎曰吾脫死如毫釐而復求進乎天子改試期八月公竟不就試除建甯府教授當是時公之禮經特聞行省分闈東帛聘之士之得出其門者無不自為榮也久之致仕歸徜徉山水之間相倡和者小野倪宗正秋江管溥東餘徐彬家錄贊棘院失火脫死毫釐絕意進取鱸堂幽栖

曰 秉鐸鎮武分闈陝西經師碩望遠邇宗之

明萬里尋兄孝友小雷府君諱璽李家塔支十一世

小雷府君諱璽字廷璽兄弟六人長伯震商於外踰十年不



歸府君魂祈夢請卜之瓊茅蚌殼之間茫然不得影響作而  
曰吾兄不過在域內吾兄可至吾何獨不可至乎躡屩出門  
鄉黨阻之曰汝不知兄之所至東西南北從何處尋起府君  
曰吾兄商也商之所在必通都大邑吾盡歷通都大邑必得  
兄矣於是裂紙數千繕寫其兄里系年貌爲零丁所過之處  
輒榜之宮觀街市間冀兄或見之卽兄不見而知兄者或見  
之也經行萬里三山獠洞八角蠻陬蹤跡殆徧卒無所遇府  
君禱之衡山夢有人誦沉緜盜賊際狼狽江漢行者覺而以  
爲不祥遇士人占之問君何所求府君曰吾爲尋兄至此士



人曰。此杜少陵春陵行中句也。春陵。今之道州。君入道州。定知消息。府君遂至道州。徬徨訪問。音塵不接。一日。奏廁。置傘路旁。伯震過之。見傘而心動。曰。此吾鄉之傘也。循其柄而視之。有字一行。曰。姚江黃廷璽記。伯震方驚駭未決。府君出而相視。若夢寐。慟哭失聲。道路觀者。亦嘆息泣下。時伯震已有田園。妻子於道州。府君卒挽之而歸。嘗觀史傳。人子所遭不幸。間關踣頓。求父求母者。不絕書爲人弟而求兄者。無聞焉。豈世無其事歟。抑有其事而紀載者。忽之歟。方府君越險阻。犯霜雪。跋涉山川。餓體凍膚而不顧。箝口槁腸而不卹。窮天



地之所覆載。際日月之所照臨。汲汲皇皇。惟此一事。視天下無有可以易吾兄者。而其時當景泰天順之際。英宗景皇。獨非兄弟耶。景皇惟恐其兄之入。英宗惟恐其弟之生。富貴利害。伐性傷恩。以視府君。愛惡頓殊。可不謂天地綱常之寄。反在草野乎。

遺獻公南雷文約萬里尋兄記

炳屋謹案遺獻公撰季真先生諱葆素忠端公之弟墓銘云。吾祖小

雷。孝友神聽。萬里尋兄。三年磨鏡。公蓋尋兄三年。以磨鏡

所得為旅費也。

贊 磨鏡三年尋兄萬里至誠感神仍同姜被




曰 孝義肫肫名標青史英宗廓王能無愧死

明詩人半山府君

諱嘉仁 古路支十一世

先生諱嘉仁字一元父翊字九霄善近體詩今其詩失落而  
半山之詩尚存十之一緣情綺靡之功聲勢物景能感動人  
使其載之唐詩紀事中故亦嫣然秀出者也而屈抑於諸生  
以死其中原少年之相倣倣競作新詞自謂何李詩體一經  
品題姓名便不寂寞先生與一二窮退無力之徒倡之而未  
必能和和之亦竟莫能解也安望其傳之之廣乎由先生父  
子言之百年之間父老見聞猶在已同鳥鳴花發歸於泯滅





况有唐千年之遠耶。則姚江無一詩人之傳者。非因風雅道

衰。亦可知矣。

摘錄遺獻公半山先生集序

炳屋謹案家錄載公句。如窮將入骨心猶壯。老倦趨時夢亦清。又苔裊展綠連朝雨。松粉飄黃昨夜風。又梯山有腳雲將雨。繡地無名草自花。又山當好處偏多寺。地到斷頭方有橋。又對酒易爲今日樂。看花猶記少年狂。結句如柳衰荷盡芙蓉老。交割秋光與菊花。又西風也不從公道破。屋人家分外多。又年年江上無情鳥。只帶秋歸不帶書。其可傳無疑者。



贊 紅葉山頭白雲隴口詩料當前得心應手

曰 斷句零章珍逾瓊玖地久天長詩名不朽

明敕授文林郎宏治辛酉舉人江西金谿縣知縣履齋府君

諱

嘉會

古路支十一世

履齋公諱嘉會字懋禮讀書城南僧舍脅不霑席者數年遂得博覽學使者謂姚江才壓旁邑必得通五經者爲第一於是第一公宏治辛酉舉於鄉其後十四年知金谿縣事撫屬六縣金谿與樂安遠水樂安無兌准而金谿租米之致淮者費三石有奇而得一石又割金谿西北境十八里立東鄉其



兌淮之米尙留金谿。公皆移文除之。由是見稱。武宗南巡。公預備諸費。民用不擾。人益以爲能。考上上。乃公竟乞休。初道南公無子。以公爲後。晚生嘉全。公視其能立。復歸。後於本生。

家錄

贊 學貫五經。以博擅名。政安萬民。以能見稱。

曰 績考。上上。遽謝簪纓。心輕利祿。志慕山林。

明欽州知州正德戊辰進士鶴溪府君諱嘉愛古路支十一世

潁州公諱嘉愛。字懋仁。別號鶴溪。九霄先生之子也。正德戊辰進士。知潁州。改欽州。卒於官。公從王文成講學。抱負不凡。



嘗有詩云。文章自荷逢明主。道學還期覺後人。乃左官萬里。  
鬱鬱不得志。其弟半山挽之詩云。鳳翔天上九苞高。文采呈  
祥冠俊豪。青海三年遭宦謫。白頭雙淚倚門勞。日沉霄漢光  
芒掩。雲鎖山川怨氣饒。老我惠連情似海。離騷空賦對誰招。  
訃回萬里禍雙雙。鳳去雛隨痛夭亡。半紙浮名真幻夢。三春  
玉樹忽重霜。神遊老瘴終辭廣。魂逐孤雲始返杭。骨肉一家  
三苦處。西風泣斷幾肝腸。其境遇可知矣。潁州集序

贊 陽明之徒菊泉之子文采九苞左官萬里

曰 魂逐孤雲名留半紙斯道仔肩誰爲知己



明賜進士及第敕贈文林郎宜興縣知縣南浦府君諱堂周家

埠支

十一世

南浦公諱堂字勉敬。螯菴公子也。宏治乙卯舉於山東。後七

年壬戌會試既第。未廷試而卒。詳家錄以子夔贈文林郎江南

宜興縣知縣。宗譜載南浦軒記云。同年勉敬兄居之南。有浦

曰臨清。如帶之環。一鑑澄澈。而上映碧落。淵泉時出。屈曲流

清。不舍晝夜。因構軒於左。纖塵不入。吾兄未登第時。左經右

史。常養志於其中。日親黃卷。與聖賢對語。而俗客不容往還。

繼晷焚膏。分陰是競。故得養成國家之器。而卓越人表。宏治



乙卯科折秋香第一枝。攜書北上。春闈未捷。又藏修於斯。奮志尤篤。或神思少倦。適情於南浦川流之上。歌詠以養其性情。時人僉曰。南浦居士。異日南陽臥龍。奮然而起。將以沛南浦之波瀾。膏澤於天下。旣而奪標於壬戌科。三英雄之魁。殿試第三人。未傳臚。先一日卒。嗚呼。凌雲之志已酬。蒼生之望未副。吾兄之不幸。實吾民之大不幸也。同志者孰不爲之太息。予忝瓊林之末。幸宰吾兄之邑。因記此以貽厥後。賜進士出身。知餘姚縣事。直隸固安縣。年弟董鑄撰。

炳屋謹案家錄云。舉於山東。記云。折秋香第一枝。似本省。



解元今查邑志選舉表公名下不註山東榜而貢舉考略是科浙省解元爲會稽陶莊敏公諧卽或舉於本省非解首矣家錄云未廷試而卒記云廷試第三人未傳臚卒查邑志進士表有公名而是科進士題名碑錄不列公名究不知卒於廷試之前後也

贊 圭璋之器廊廟之英簪花瓊宴射策天廷

曰 鵬方展翼龍待爲霖玉樓遽召未杼經綸

明王門弟子丁山府君

諱

元釜

古路支十二世

丁山先生諱元釜字汝用安定公十二世孫也祕圖山人楊



珂壽之曰。邃壑之璞。鍊鑿弗能加焉。人知其爲壽也。而不知其珍瑜匿璨。藏之深也。遼海之鶴。彈弋弗能及焉。人知其爲壽也。而不知其翱翔翹翻。舉之遠也。巍崖松柏。多歷年所。而大匠無所用其斲焉。人知其爲壽也。而不知其灑霏霜霰。勿爲改柯易葉。性之定也。我姚丁山黃公。今年陟於八秩。人咸謂將與璞鶴松柏同壽也。而公之所以受壽也。何居。君子曰。壽之爲言。讎也。天與其自行可久之道者。其壽讎於久。不自行其可久之道者。其壽讎於不久。久與不久之精。亦各讎其生平之所行。是故行其道者人也。而非天之所能私也。讎以



壽者天也。而非人之所能必也。天人交至。余於丁山公之壽稽焉。公少業儒。博洽經史。是厚於積也。而能祛黜矜吝。自處若愚。公四子。河汶有聲庠序。沂亦力舉子業。是將顯於用也。而能知義安命。視富貴得不得若浮雲。迨其老也。種菊和陶。毀譽寵辱。無得而加。年躋八秩。猶讀書常若不足。惟自處若愚。藏之深也。惟浮雲富貴。是舉之遠也。惟耄而好學。是性之定也。惟其性之定。舉之遠。藏之深也。是與璞鶴松柏同其養。公之盡夫人也。由是與璞鶴松柏同其壽。公之得乎天也。人行其可久之道。天讎以可久之壽。嘻。若丁山公者。夫豈適然。



之遇耶。或曰。公嘗學於陽明先師。年來又喜談坐功。則今之  
所以永命也。有奇術焉。余曰。不然。公之壽。子所得而知也。公  
之所以受壽。余所得而言也。若夫事有出於天人之外者。則  
非子可得而知。余可得而言也。嘉靖己未秋八月望前二日。

丁山先  
生集序

贊 璞鶴之質松柏之姿祕圖為友陽明是師

曰 浮雲富貴悅志書詩歸真返璞悟澈良知

明景州知州嘉靖己酉鄉進士醒泉府君 諱 尚質 泉水支十二世

遺獻公作醒泉府君傳云。正德丙寅。謝文正致政歸。與馮雪



湖相倡和戲排舊韻別創新詞往復至於八九嘉靖辛酉呂  
文安憂歸與黃醒泉相倡和當花對酒登山臨水無日無之  
姚江風雅惟此兩時爲最盛承平士大夫之風流今無復有  
夢見之者矣醒泉則余五世族祖也諱尙質字子殷醒泉其  
號也吾始祖鶴山十二世孫祖浙父舜卿母邵氏府君生時  
母有夢筆之祥幼而穎異日誦千言稍長以易爲大師湖守  
胡君聞其名遣子從學舉嘉靖己酉科浙江鄉試知息縣事  
府君吏治以教化爲先民曾珣兄弟訟產府君手書常棣章  
與之曰熟讀後始爲若理越數日詣府君求直府君曰前詩



熟否曰熟。府君發明詩義。慷慨嗚咽。珣兄弟感動流涕。不待終章。相讓而去。或怪其速化。府君曰。人孰無天性。批之以法。愈見其汨沒耳。尋遷景州守。景州多盜。皆勸其刻深爲治。府君曰。不然。景瀕滄海。而麓太行。苟如此。是驅之爲盜也。於是捐鉤距。省簿書。多所縱舍。盜自衰止。明年修董仲舒書院。周亞夫祠。自爲文記之。相觀以經術。使民不遊學堂。與撻市。同時分宜竊柄。大官多出其門下。府君激烈抗憤。發言無所梗避。聞者惡之。分宜旣敗。分宜之黨未衰。廉平之譽無由漸朝廷之耳。黽勉六載。乃自免歸。築室烏膽山。讀書賦詩。耳目所



及分爲十四景。片石孤枝題品張皇萬厯丁丑元旦庭誥諸  
子手書付之。二十三日卒。年七十四。府君與雪湖皆不受人  
牽挽。雪湖母年九十固不欲出。府君之在景州。呂相氣勢方  
盛。府君巉嶮偏州。未嘗以尺牘自鳴不平。其自重如此。府君  
所最善者楊珂徐渭。其詩文書畫齊稱一時。而弇州主盟壇  
坵士之未捧珠盤者多見詆訶。三人崛起不甘於邾莒。故徐  
渭之詩楊珂之字皆有貶辭。於府君無稱焉。百年以來渭以  
袁公安顯珂僅有知者。府君姓名幾將湮沒。余因選其詩而

爲之傳。

黃氏  
續錄



贊 詩歌常棣化否為臧術捐鈞距化盜為良

曰 振興學校民知周行政成身退詩酒徜徉

明嘉靖乙卯貢元宜興知縣後川府君 諱 夔 周家埠支 十二世

後川公諱夔字子韶南浦公之子也以貢生任宜興知縣從


學王文成公浙中王門學案曰卽以寒宗而論黃驥字德良

尤西川紀其言陽明事黃文煥號湖南開州學正陽明使其

子受業有東閣私抄記其所聞黃嘉愛字懋仁號鶴溪正德

戊辰進士官至欽州守黃元釜號丁山黃夔字子韶號後川

皆篤實光明墨守師說以此推之當時好修一世湮沒者可





勝道哉。文成叙曰：異時名立政成，俾人稱黃氏賢子孫者，其

夔也夫。宗譜

贊 王門高第南浦後人，光明篤實師說遵循。

曰 鳴琴陽羨，名立政成。黃氏賢嗣，見稱陽明。

明誥封大中大夫太僕寺卿鯤溟府君

諱曰中 李家塔支十五世

封太僕公諱曰中，別號鯤溟。以易教授吳興，諸生應試公先第其高下，無不奇中。然公爲文，援據經術，一切剝竊攘之詞，不屑爲也。公久在外，家產日落，嘗薄暮徬徨簷下，諸生問故。公曰：計無以卒歲，諸生皆願有所輸。公曰：吾不忍累諸生。



卒謝之。其狷介如此。忠端公旣第鄉邑，利害公必毅然聞之。當事口授手畫，未嘗假借一詞。當事卽心不懌，而識公一無所私也。嘗議南糧事，公言是役破家不一，不如以道里之費稅畝而官解之。有蔣太常者曰：稅畝則均役，非搢紳之利也。公曰：吾所言者爲諸君子孫計，諸君能保後世之不降爲阜隸乎？時父老子弟會者千人，皆竦聽歎息。忠端公上書請誅閹人魏忠賢，詔下捕忠端公，公俱入京師。忠端公在獄，魏忠賢縛公置神祠中，榜掠之，使籍記其往來者。公對倉卒不能悉，有尺書藏某所，可取視，迺其人寬公，公得脫走。已而天子



磔魏忠賢封公太僕寺卿。一時與忠端公同死節者，惟忠端公有父。當是時，東浙之爲魏忠賢舍人而至大官者，皆髡黥歸里。公獨見榮於世，故遇公府，縣則大慙，公亦困阨之久。時有所發舒，縣令蔣燦者，訾大官之氣勢，常恐失其歡心。忠端公之發喪也，燦將弔於殯宮。公遺書顯責之曰：「此郊弔也。明府以春秋起家，尙不讀左氏傳乎？燦爲之媿謝。由是不能無芥蒂。與諸大官者，每事多推築。公公不勝憤憤而卒。公之將卒，乃仰天而歎曰：「京師天下之奇觀也。余蒙難而入，晝伏夜行，曾不得一見都邑之盛、宮闕之美。其時吾謂人曰：使吾得



再遊其間無所恐懼則生平之願足矣今已矣亦命也夫公  
逢贈太僕之怒必伏地請扑有為公解之者公麾之曰吾以  
大人釋怒為喜不以免仆為喜也安定公祠宇將圯公撤而  
新之不以煩其宗人公之為學質而不華求之古人庶幾乎  
獨行之士矣家錄

贊 吳興大師義經是則藻鑑精明介節孤特

曰 澹臺無私史魚秉直晚荷榮封義方足式

明工部觀政萬厯庚戌進士鳳署府君諱球白鶴橋支十五世

鳳署公初名應立字鳳東萬二公十五世孫萬厯戊子以易



經舉於鄉補通州學正改名琰字鳳署登庚戌進士集選明  
文海家錄云公經義有名於時而間出入繩墨陶文簡分經  
禮闈得一卷乙之以示同考官曰必餘姚黃應玄也拆糊名  
果然公聞之心折遂北面文簡稱弟子改名第進士已爲教  
諭矣尋卒

宗譜

贊經義擅名間疏繩尺幸獲指南願居面北  
曰金榜恩榮崇川教澤虛己進修爲士林式

明山東道監察御史誥贈大中大夫太僕寺卿諡忠端白安

府君諱尊素李家塔支  
十六世



忠端公諱尊素字真長別號白安少卽博覽經史不專爲科舉之學初名則燦數試不利夢景州公謂之曰盍名吾之名景州公名尙質覺而異之故易今名登萬厯丙辰進士授甯國府推官是時湯祭酒免歸鄉里所號爲宣黨之魁者其門生滿天下有司唯恐不得其歡一郡之事祭酒多先受牒判之有司理牒投牒者出祭酒所判有司判之一如祭酒相沿成習公視事有出祭酒之牒者公怒曰湯祭酒乃欲土司甯國乎裂其牒扑出牒者郡中震慄涇令初著叨穢聞之乃曰是不畏湯祭酒者何難按舉吾屬哉終公任不敢爲姦利事



大姓劉氏。置私獄殺人。公欲按之。值考選。或曰。公已成名。宛上似此盤錯。宜俟後人。公曰。吾志掃姦鄙。今當前而避之。羞稱執法之吏矣。訟劉氏者數百人。悉爲斷理。收其僮客論死。劉氏飛章京師。鄒元標先生爲左都御史。由此知公擢山東道監察御史。當鄒先生長憲時。諸君子日追理。挺擊紅丸。移宮三案。斷斷而爭之。或謂公曰。今論人者。以三案爲鑑。公胡無說於此。公曰。三案已爲成事。今日宮府所急。似不在此。亡何。鄒元標劉宗周二三先生去國。公上書請惜老成。京師地震。公又上書。阿保重於趙媯。禁旅近於唐末。蕭牆之憂。慘於



戎狄毫末不札。將尋斧柯。天啟初。闈人魏忠賢。帝乳母客氏。干涉外廷。臺諫有言及之者。皆誣。是後四年之中。莫之敢指。公獨發憤。悃愾中旨。廷杖。韓相國爌救之。得罰俸。公風裁著聞。然志在濟險。不欲聲名自高。當是時。魏忠賢客氏。雖陰寄國命。小人之希附者。亦惟恐人知。南樂魏廣微者。以魏忠賢宗人得相。其父允貞。故與趙忠毅友。忠毅尙書吏部。廣微猶以故人子自託。亡何考功郎缺。忠毅取鄒公維璉。自兵部郎補之。江右章允儒與咨訪。不得而怒。欲敗其事。桐城阮大鍼求長吏垣於左。忠毅得之。已而左。忠毅移意於魏忠節。阮大



鉞怒欲致難於二公。遂稱終養。公謂同志曰：「二憾往矣。余聞之。范文子曰：『能內睦而後圖外。不睦內而圖外。必有內爭。今闇人伏愚。吾方內爭以啟之。非國之福也。』二三子亦姑謀睦乎。於是移書阮大鉞。勉之和衷。子不去吏垣。則嫌隙可弭也。不聽。而給事中傅櫬與魏忠賢養子傅應星遊。阮大鉞章允儒合謀。使傅櫬奏左光斗、魏大中與汪文言交通狀。魏忠賢從中主之。收文言送詔獄。汪文言者。以布衣遊公卿間。公卿多與之計天下事。文言謁公。公不肯見。曰：「夸者死權。文言之謂乎。」至是乃曰：「文言不足惜。使君子之禍由之。不可從。劉鎮



撫僑計畫所以全者遂出文言楊忠烈欲劾魏忠賢草具公  
曰公大臣非諫官比一擊不中禍移之國矣忠烈曰何謂也  
公曰從來除君側者必有內援公有之乎忠烈默然公曰無  
已奏中宮嬪之事削其風聞苟毫髮不爲上所實則上不實  
其實矣不聽疏入公亦草疏助之乃聞魏忠賢辨上前果自  
宮嬪事始忠烈既激怒魏忠賢忠賢欲以廷杖威脅諸在位  
者會萬忠貞言鑄錢事連魏忠賢忠貞被杖死公上疏曰爲  
廷杖之說者必曰祖制不知二正之朝王振劉瑾爲之世廟  
之時張孚敬與嚴嵩爲之神廟初年張居正爲之奸人爲所



欲爲惟恐忠臣義士之撓之也。借廷杖以滅怨。奔車一轍。後世有秉董史之筆。作朱子綱目者。書曰某月某日。工部郎中萬燦以言某事死。不爲聖明之累哉。廷臣會議東閣。內侍數百。譁然以辱言官之劾。闖人者。閣臣面頰不能發語。公厲聲叱之曰。內閣朝廷股肱之寄也。卽司禮非詔不敢入。汝曹何爲者。大不敬。衆乃引去。於是謂忠烈曰。萬郎中由公而死。公宜筮遯。所謂知者見險。投以遠害。忠烈曰。苟利社稷。生死以之。公曰。進退以禮。身名俱全者。上也。身死名存者。次之。忠烈然之。深念者數日。而使李忠毅再質之。公公笑曰。去留斷之。



於己考合眾議可否乃亂亡何太廟祭享魏廣微偃蹇失期  
魏忠節將糾奏之公曰不可夫廣微小人之包羞者也阮大  
鍼挾縱橫之術爲內外騎驛此積薪也奈何復厝火乎忠節  
笑曰古之沒小人者豈能必勝要使埋銘不寂寞耳公曰不  
然李固機失謀乖猶遺梁冀書君子社稷之心重於名節忠  
節卒糾奏之於是廣微取朝籍甲乙於姓名之上甚其宗人  
魏忠賢曰此東林黨人公之所不便者也公而視此可舉網  
盡之矣其後誅徙之禍皆廣微之所甲乙者嗚呼新法之行  
吾黨不爲無過使小人計出無聊借閹人以報怨者天啟諸



君子之過也。乃公彌縫其闕。先事綢繆之至意如此。天下但聞其婞直之風。豈不可歎哉。公精典故。故言事皆有原委。中州進玉璽。廷議開大明門。迎入行受璽禮。公曰。黨禍將興矣。宋哲宗得璽。蔡確等傅會之。改元元符。君子貶黜無虛日。今天人之數。何相合哉。乃上言。宏治中甲令。不當襲衰宋事。五星聚張。或言張之分野。當生異人。公曰。嘉靖三年聚室。占主營建。殆將有三殿之工邪。已皆如公議。明年公巡視茶馬。主事曹欽程劾公前疏。有推擇名賢以重風紀者。陰爲高忠憲地。遂削籍。楊忠烈魏忠節爲閹人所害。公哭之於野。慟又明。



年闈人李實劾公家居講學與忠憲之屬交私詔下徵公連坐者六人使者至吳爲百姓箠死公聞變卽間道投獄或言亡命縣令祁逢吉操兵到門公在道聞之移書逢吉曰抱頭鼠竄豈免一死昂首伸眉落得骨頭香耳君何小視海內男子也時高忠憲以大臣不辱自裁周忠惠途遠未至公偕李忠毅周忠介周忠毅繆文貞四公高談獄中慷慨怒罵繼以詩歌門人徐忠襄私之公曰子無用戚我我於此豈減黃霸之受尙書哉魏忠賢使許顯純以次掠考李忠毅嬰病公考竟次李忠毅乃公復就考許顯純詰之公曰李公不任楚毒



吾代受之。魏忠賢又次第使其私人害諸公。存者惟李忠毅與公。已而害公者至。北面再拜謝。君南向再拜辭。父母賦詩一章薨。天啟丙寅後六月朔也。年四十三。又三日而李忠毅亦死。公薨之後。魏忠賢志益盛。一時小人勸進呼嵩祠之者。徧天下。其後一年。熹宗崩。烈皇卽位。魏忠賢以謀反伏誅。贈公太僕寺卿。賜祭葬。又十五年。諡公忠端。家錄

贊 積薪厝火防患未形。審幾觀變。慮禍將成。

曰 貂璫肆虐。龍比批鱗。致命遂志。天柱支撐。

清欽徵遺獻。明都察院副都御史。議諡文孝。太冲府君。諱宗



義 李家塔支  
十七世

先生諱宗義字太冲號梨洲又號南雷忠端公長子也忠端公五子先生最晚沒學問淵海名冠海內發明戢山劉子誠意慎獨之說東南學者推爲劉門董常黃榦少補仁和學諸生而忠端公以劾魏忠賢客氏死詔獄莊烈皇帝登極誅忠賢收捕奄黨先生年十九袖長錐艸疏入京頌冤得賜葬祭贈官錄後再疏請誅曹欽程李實蓋二人受忠賢指論公而爲大理考問公者許顯純也五月會審顯純自訴孝定皇后外甥律有議親之條先生對簿顯純與魏忠賢謀反引高煦



宸濠親王戮社例以錐錐顯純血流被體卒論立決妻子流  
三千里又與夏之令子光山夏承周宗建子吳江周廷祚共  
箠所頭牢顏咨葉文仲登時斃六月會審李實李永貞劉若  
愚三奄於中府實辨原疏不自己出忠賢取空本令永貞填  
寫故墨在硃上屬先生所親行賄三千金先生疏奏之謂實  
當今日猶敢賄賂公行其所辯豈足信復用錐錐實當是時  
先生義勇勃發自分一死衝仇人胸賴天子仁明念忠臣遺  
孤不加罪會審之日觀者無不裂眦變容繇是姚江黃孝子  
之名震天下事定還里四方名士無不停舟黃竹浦願交孝



子者。宏光朝。阮大鍼起用。欲盡殺天下清流。先生幾及於禍。浙河監國。授兵部職方司主事。陞監察御史。仍兼職方總兵。陳梧大掠餘姚。王職方正中行縣事。集民兵擊殺之。諸臣欲罪正中。先生曰。梧干眾怒。是賊也。正中爲國保民。不當罪。監國是之。尋以先生所作監國魯元年大統。麻頌之。浙東先生力陳西渡之策。孫公嘉績以所部火攻營卒。盡付先生。先生與王正中合軍。渡海。劄潭山。烽火遍浙西。太僕寺卿陳潛夫。職方查繼佐。以軍同行。而尙寶司卿朱大定。兵部主事吳乃武等。皆來會師。議由海甯取海鹽。因入太湖。招吳中豪傑。百



里之內。牛酒日至。軍容甚整。直抵乍浦。會大兵纂嚴。不得前。復議再舉。而江上已潰。先生入四明山。結寨自固。微服潛出。訪監國消息。山民潛焚其寨。先生無所歸。而跡捕之檄累下。先生以子弟走入剡中。己丑。聞監國在海上。乃與都御史方端士赴之。晉左僉都御史。再晉左副都御史。時諸帥之悍甚於方。王文臣稍異同。其間立致禍。先生既失兵權。日與尙書吳公鍾巒坐船中。正襟講學。暇則注授時泰西回回三厯而已。先生之從亡也。姚太夫人尙居故里。而中朝有詔。凡勝國遺臣不順命者。錄其家口以聞。先生聞而歎曰。方



寸亂矣。吾不能爲姜伯約矣。乃陳情監國。得請變姓名。間行歸家。是年監國由健跳至翁洲。復召先生。偕馮侍郎京第。乞師日本。抵長埼。不得請。先生賦式微之章。以感將士。其後翁洲城陷。先生無復望。遂奉太夫人居山中。大啟蕺山書。深研默究。謂世知蕺山之忠清節義而已。未知其學也。其學則集有宋以後諸儒大成。聖人復起。莫之易也。於是作劉子行狀。要其指歸之精微有四。一曰靜存之外。無動察。木之培必於其本。省察卽存養中。切實工夫。一曰意爲心之所存。非所發。傳曰。如惡惡臭。如好好色。指所存言也。如意爲心所發。孰爲



其所存者乎。一曰已發未發。以內外對待言。不以前後際言。四氣所以循環不窮者。賴有中氣存乎其間。而發之爲太和。元氣是以謂之中和。存發止是一機。中和止是一性。一曰太極爲萬物之總名。易畫一奇。太極之象。因而偶之。陰陽之象。太極卽在兩儀。四象八卦中。理因形氣而立也。四者之要。總歸於慎獨。人心徑寸間。空中四達。是爲太虛。虛故生靈。靈生覺覺有主。是曰意。寂然不動之處。惟此不慮而知之靈體。故舉而名之曰獨。少間見聞情識紛起。雜而非獨。慎之無及矣。可知獨卽意。意非念也。氣卽理。非理生氣也。謂理生氣。與佛



者有物先天地之說何別也。武進惲日初仲升氏編劉子節要。握先生手曰。今日窺先師堂室者。惟吾與子。議論不可以不一。但於意非所發。宜稍融之。先生不答。先生之學。不名一家。苦心焦思。自謂以魯得年二十二。讀二十一史。日限丹鉛一本。家仇黨禍。舟車茅店之內。手不去編。寒夜抄書。必達雞唱。暑則穴帳通光。以避蚊蚋。早受先公命。執贄戴山。然竟崇禎世一十七載。詩文盟會。交游聲氣。去其半。及戴山夢奠。擔簦避寇。匿影憂讒。海澨山陬。饑寒顛踣。而後乃一意於師門之學。然碑版記述。天官星厓。勾股壬遁。夙所精兼。未能棄也。



自言生平所不作者。祝嘏諛柩之文。人亦莫敢強。康熙丁未。復舉郡城證人書院講會。戊申。舉比鄞城。謂學問必以六經爲根底。於是甬上遂有講經會。先後主海甯紹興講席。而所就經術湛深。士以甬上爲最。雖時文淺說。亦知崇本。戴山先生倡明之功大焉。己未。詔徵博學鴻儒。掌院學士葉公方。藹以先生面奏。御前先生力辭不赴。未幾。聘先生修明史。詔督撫以禮敦遣。先生以母旣耄。期己亦老病。爲辭。葉公知必不可致。因請。詔下浙中督撫抄先生所著書。關史事者。送入京。庚午春。刑部尙書徐公乾學侍直。



上訪及遺獻復以先生對

上曰可召來朕不授以事如

欲歸當遣官送之徐公對以篤老恐無來意

上因歎得

人之難如此時先生年八十矣歲戊辰自為生壙於先公墓

畔諭以死後次日昇致石牀上一褥一被不用棺槨不作佛

事七七諸鼓吹巫覡銘旌紙錢紙幡概去不用作梨洲末命

一篇子百家遵末命即於歿後一日葬化安山立石捧土塞

壙門焉其卒以康熙三十四年七月年八十六門人私謚文

孝先生所著有明儒學案六十二卷有明三百年儒林之藪

也經術則易學象數論六卷授書隨筆一卷春秋日食麻一





卷律呂新義二卷。孟子師說四卷。史學則宋史叢目補遺三卷。明史案二百四十四卷。有贛州失事一卷。紹武爭立紀一卷。四明山寨紀一卷。海外慟哭紀一卷。日本乞師紀一卷。舟山興廢一卷。沙定洲紀亂一卷。賜姓本末一卷。又有汰存錄一卷。麻學則授時麻故一卷。大統麻推法一卷。授時麻假如一卷。西麻回麻假如各一卷。外尚有氣運算法。勾股圖說。開方命算。測園要義。諸書共若干卷。文集則南雷文案十卷。外集一卷。吾悔集四卷。撰杖集四卷。蜀山集四卷。子劉子行狀二卷。詩麻四卷。忠端祠中神絃曲一卷。後又分爲南雷文定



凡五集。晚年又定爲南雷文約。明夷待訪錄二卷。留書一卷。則佐帝匡王之略。思舊錄二卷。中多庀史之文。又選明三百年之文。爲明文案。後廣之爲明文海。共四百八十二卷。又作今水經。四明山志。台宕紀游。匡廬游錄。補唐詩人傳。病榻隨筆。黃氏喪制。姚江瑣事。又選姚江逸詩。姚江文略。晚年於明儒學案外。又輯宋儒學案。元儒學案。於明文案外。又輯續宋文鑑。元文抄。尙未成編而卒。先是忠端蒙難。封太僕卿。鯤溟公在堂。先生承養祖父。具給鮮旨。後敦匠事。冒暑重趺。道諸暨。購美檀歸。直二百金。四弟幼孤。身自教育。迄於成立。仲弟



晦木叔弟澤望。並負異才。與先生有東淵三黃之日。崇禎庚辰。充解南糧。連歲奇祲。家人環泣。先生走黃巖告糴。值遏禁嚴。謀於王峩雲。倪鴻寶。祁世培三君子。其事得集。順治庚寅。晦木以連染被執。將罹大辟。先生赤足行冰雪中。十指皆血。求救於馮君道濟。得胡珠百顆。獻之大帥。乃得釋。丙申。墓祭戴家山。闔門子弟爲山寇所縛。又求救於沈李二君。乃得放歸。凡所遭逢。皆人所不能堪者。乃卒以大儒耆年。受知當世。又終保完節。不可謂非貞元之運護之矣。

邵處士廷采  
思復堂集文

孝先生傳參全太史祖  
望鮪埼亭集神道碑



贊 韓蘇文章伏鄭經術魏闕頌冤虞淵捧日

曰 晚際昌期終持介節辦香叢山孫李鼎立

明儒林邑廩膳生晦木府君

諱宗炎李家塔支十七世

晦木公一字立谿更號鷓鴣山人忠端公仲子少有文望補


邑諸生崇禎己卯秋試不售與弟澤望公約閉關盡讀天下

書而後出而問世劃江之役公兄弟帥家丁荷戈前驅步迎

監國於蒿壩伯子西下海昌公留龕山以治輜重所謂世忠

營者也事敗走入四明山之道巖尋參馮侍郎京第軍事侍

郎軍殲亦引逮下獄其友萬泰救免盡喪其貲遊海昌石門





之間賣藥鐫篆作畫製硯以自給。然壬寅高元發之難，浙東震動，公所以營護之者，不遺餘力，不以前事怵也。公於象緯律呂軌革壬遁之學，皆有密授。既自放，乃著憂患學易以存遺經，著六書會通以正小學。雅不喜先天太極之說，嘗著論辨駁之。門人有問學者，曰：諸君但收拾聰明歸之有用一路足矣。嘗解易離之三曰：人至日昃，任達之士託情物外，則自謂有觀化之樂，故鼓缶而歌。不然，憂生嗟老，戚戚寡歡，不彼則此。人間惟此二種皆凶道也。君子任重道遠，死而後已。衛武公之所以賢也。生平作詩幾萬首，沉冤淒結，晚更頽唐。大



似誠齋其論小學也謂揚雄但知識奇字不知識常字不知

常字乃奇字所自出也所著憂患學易其目曰周易象詞十

九卷尋門餘論二卷圖學辨惑一卷此外又有六書會通及

二晦山樓集若干卷康熙丙寅卒年七十有一節錄全太史祖望鮎埼亭

集鷓鴣先生神道表

贊 桑榆緹日營號世忠憂患學易道啟羣蒙

曰 研精古篆六書會通鷓鴣隱跡二晦山中

明崇禎甲申鄉貢進士澤望府君諱宗會李家塔支十七世

澤望公諱宗會甬上陸文虎以其窮經似先儒黃澤楚望而



字之也。別號縮齋。忠端公第三子。自幼倣儻不羈。年十六補弟子員。崇禎甲申。充選拔明經。未廷試。國變。是時公年二十七。孤憤寡徒。始放之於酒。所撰著數十家。體例各異。散之於日記中。康熙二年癸卯八月八日。以臆疾卒。得年四十有六。公冥搜博覽。天官地志。金石算數。卦影革軌。藝術雜學。無勿習者。其詩初喜僻奧。既而稍變。其文華藻錯落。頗以王微范。惝爲則。後亦日就刊落。自濂洛至今日。儒者百十家。皆能知其宗旨。離合是非之故。忽折而入於佛。穿剝三藏。窮歲累月。牛毛繭絲。爲其教之書。數十萬言。生平負氣好高。必欲突兀。



自異亦自度不可與世接乙酉以來未嘗一渡錢塘山隩江  
村枯槁顛顛呼天搶地竟隕其身是豈學佛者所宜有其學  
佛也將無憤憾之氣無所於寄亦如屈原之於騷孟郊之於  
詩張旭之於書耶著有縮齋文集若干卷縮齋日記若干卷  
學御錄一卷瑜珈師地論注若干卷成惟釋論註若干卷

節錄

遺獻公南雷文定  
鄉進士澤望壙志

贊 儒術百家研窮奧窔佛法三藏精探幽妙

曰 舉世無知呼天大叫一尺遺書伊誰檢校

明儒林邑庠生道傳府君 諱宗裔 周家埠支  
十七世



先生諱宗裔。字道傳。號南浦。年甫成童。遺獻公見其文章。喜意外得後進之英。近在族中也。凡遇勝流。必交口讚之。先生亦自感激奮勵。旋補博士弟子員。屢試優等。凡夫社卷流行。名賢蒞止。先生亦遂附文其中。晉接其末。而天下并知三黃之後。有弟道傳焉。桑海之交。遺獻與諸弟采薇志決。而先生亦輒謝科舉。遺獻阻之曰。爾無國恩之受。非吾屬比也。甯不自惜其文耶。先生曰。某計定矣。夫子步亦步耳。自是終身惟以研土硃。課童子。作生活計。而一輩連袂縣庠。素所俯視者。往往獲躋青雲。烜耀里黨。先生雖甚食貧乎。絕自忘。抱取榮



之具而不生自悔之心也。卒於康熙辛巳九月某日。年八十。三配張氏子。二正體庠生。德本殤。先生賦性仁柔。於物無忤。而是非之界。畫井如弱冠。卽授經遺獻家。遺獻嘗云。吾於道傳。平居則詩文倡和。患難則架漏牽補。當骨寒心折。周章踟躕之時。相與周旋者。唯一道傳乙丑。遺獻遷居周家埠。先生作詩執贄。更復稱弟子。過從之暇。卽手學案一卷。老眼細書。蕭條荒浦。鬚鬢白髮。兩人復相朝夕者十年。至遺獻夢奠。而先生熒熒莫甚矣。今先生又作古人。不特我黃氏老成彫盡。竊恐故國衣冠。無復有存焉者矣。

節錄主一公所撰墓誌

原其文章



炳屋謹案公係崇禎間入泮神位舊稱清庠生誤今改正  
贊年甫成童見賞耆耆時值滄桑絕意進取  
曰塵視簪纓道樂畎步趨三黃名同不朽

清欽點河南提督學政康熙壬戌進士翰林院庶吉士紫臨

府君

諱軒前園支十七世

主一公黃氏續錄云我竹橋遷居京師者八支一前園十六  
世永應字聲來爲太醫院御醫居京師子軒字紫臨康熙壬  
戌科進士由翰林欽點河南提督學政

炳屋謹案族祖箭南公續修宗譜入永應公一支於前園



外系載紫臨公康熙壬戌科進士改庶常主考江西

欽點河南提督學政未赴卒今查進士題名碑錄康熙壬

戌科紫臨公第三甲九十六名下註順天府大興縣人查

貢舉考略康熙庚午科江西正典試崇明顧侍讀藻副典

試則紫臨公也註官銜禮中二字疑府縣志選舉表不列

公名蓋籍隸燕京修志時失考也後當補入摺颺公倣此

贊 安定之裔燕都是宅譽著木天才量玉尺

曰 蠡澤汪汪汴梁奕奕望重士林口碑罔極

清敕贈儒林郎雍進士纂修明史主一府君諱百家李家塔十八世



主一先生諱百家國學生原名百學續錄名黃竹農家字不  
失黎洲先生之三子也康熙朝開明史館徐立齋相國爲總  
裁聘四方知名士共修之先生與焉文稿中有西洋人利瑪  
竇傳言西人入中國事此其史稿也先生克承家學又從梅  
勿菴先生問步算之術著有勾股矩測解原失餘詩稿學箕  
文稿輯黃氏續錄續纂宋元儒學案以子千人任泰安丞

貶贈修職郎

宗譜列傳  
參疇人傳

贊 太僕之孫遺獻之子望重儒林布衣修史

曰 黃竹農家招賢故里忠孝餘芬焜耀桑梓



清康熙辛卯順天舉人搢颺府君

諱虞俊前園支十八世

宗譜前園外系載紫臨公配林氏子五次虞起字賡颺涿州

庠生四虞采字繡五由監生考授州同五虞俊字搢颺康熙

辛卯舉人吾族父子相繼科第縣延者頗不易得乃紫臨公

既簪花杏苑而搢颺公亦採馥桂宮一家作述橋杆衍芳再

世簪纓後先濟美不誠為世俗所豔羨者哉

贊 聯芬五桂挺秀三芝蟾宮獨步尤推白眉

曰 簪纓繼世科第延輝七段之內似此者稀

清例授文林郎甲戌進士湖南慈利縣知縣續修宗譜箭南



府君

諱

嶽

白鶴橋支十八世

先生諱嶽字懷方號箭南寅齋公長子也幼學時卽朝夕刻苦冬夏不輟雍正壬子補博士弟子員甲寅夏丁父憂哀毀逾常喪葬一遵禮法後讀書別峰庵得程純公主靜之旨澄心觀理故其爲文多悟境乾隆甲子登賢書甲戌成進士任湖南慈利縣知縣悉心利弊思所以撫字民者罔不周至其教民也以孝悌爲本禮讓爲先慈利之民鼠牙雀角沿以成俗先生歸重於其父母長老俗少湔至其申明學校培養士子尤所眷眷焉在任衣服飲食一如在家時嘗慕范文正義



莊之風分俸寄歸。委人經理。為栽培任郵計。每歲生息。漸積漸豐。陸續置產。至今得一百六十餘畝。建立義學。培文郵老。一族賴之。歸田後。續修宗譜。規例秩然。平日訓誡子孫。務循循於矩範。雖燕處必以禮繩之。素心孝友。顏其堂曰仁本。并自跋以示意。年七十有一卒。著有敬業齋續鈔。別峯制藝。鶴洲自訂贖稿。吳門課徒草。生花軒詩稿。共若干卷。宗譜列傳參公田志

贊 興利除弊。惠及斯民。培文恤老。澤被族人。

曰 儉以持己。孝以事親。立身處世。規範循循。

清嘉慶丙辰歲貢 欽賜戊午科舉人己未科進士翰林院



檢討上壽鄉謚碩果東崖府君

諱

岱白鶴橋支十八世

公諱岱字鎮方號東崖寅齋公仲子也幼而岐嶷秀眉廣顙叔父魯藩公早下世叔母洪年才十九矢志守節寅齋公卽命公爲後公備極色養尤好讀書顧不務涉獵弱冠受知於督學陳公其疑補博士弟子員每一藝出必驚其曹偶華亭董公錫嘏以名進士宰龍游乾隆庚寅恩科檄入同考得公卷大奇之首呈舉主已入彀矣比揭曉以額溢遺董公大爲扼腕公聞之釋然毫不存得喪志露鈔雪纂無虛日公少無師以伯兄箭南公爲師後箭南公成進士宰慈利解組歸



時公髮亦頽白。昕夕晤從。猶循循然守弟子禮。見者服其悌。

道年及週甲。始食餼於庠。貢成均。展轉又逾十餘霜。嘉慶戊

午。公年已篤老。而神明清吉。猶且挾策入闈。奏藝奇挺。撫軍

王公德偕。試官檢閱。佚老之有才學者。得十有一人。以公爲

首選。聞於朝。其時同舉者。以道遠不赴。公獨欣然束裝行。

攜子兆瀾爲御。入京就禮部試。天子嘉予敦龐純固。有

道藝之士。特旨授翰林院檢討。誠異數也。旋以年老不

願供職。遂告歸。歸後自營息壤。優游林下者數年。歲辛未。三

月二十三日。無疾卒。宗譜者  
舊傳



贊 弱冠遊庠周甲食餼比及耄年疊荷 恩賜

曰 名列賢書躬赴部試金馬玉堂揚眉吐氣

清旌表孝子鄉飲賓雁嶼府君

諱

兆溥

古路支十八世

公諱兆溥字悅旦號雁嶼父諱之鈔字元周母徐氏公生五歲失恃踰年出就外傅繼母張氏育弟妹各一家貧父業蠶籴客菰城久不歸由是益困弟又夭熒熒無告篝燈相依年十一卽爲人牧牛晨夕必歸省得連展瓜果輒懷以遺母每念母氏劬勞而又痛父之客居於外也屢請往尋母憐其穉弱屢止之又五年遂自貸牧牛家十緡半給度支持其半渡



錢塘指西塞山。踵父所在。魂祈夢禱。遷延旬日。偶於市肆。肩摩中。恍惚見形似者。追躡逼視。果得父。乃其於子。則相對不相識矣。具道所以。驚且喜。旣而屑屑泪下。遂迎與俱歸。侍養倍至。母病。手治湯藥。脅不貼席者累月。一日。欲割股和藥。以進。夜夢神與二桂圓曰。服此。勿藥有喜也。翌旦。門外貿桂圓者至。取數枚入室。出持錢與之。則無踪矣。母病竟一服而愈。人咸知其神也。久之。母亦知其事。曰。汝誠孝。通於神明。願汝子事汝。亦如汝之事我也。女弟適陳東山。家甚窶。常以米月周之。自二親歿後。見遺物。輒涕零。作享恆。以淚掩面。鄉人有



不悅於後母者來問故曰汝能色笑出於真誠不雜一偽則無不可順之親矣公性體冲和舉動必約以禮法有司聞其賢舉鄉飲賓以禮聘之年七十有一卒配韓氏子三長杖庠生次邦輝季梅峯歲貢生

吳大本明經黃氏世孝傳

贊 髻年尋父粹遇路旁神賜療母勿藥壽康

曰 色笑無偽悅親有方天佑純孝累世書香

清旌表孝子鄉飲介賓心書府君

諱

邦輝

古路支十九世

公諱邦輝字一清號心書雁嶼先生仲子也至性過人六歲入館讀書至父母唯其疾之憂遂悟人子以守身為孝儕輩



遇以非禮。輒笑受之。羣兒目爲懦。曰：我正以懦全也。乾隆壬申歲大飢。家無擔石儲。至以草木根皮爲食。時父臥病牀褥。母患胃逆。醫藥無資。乃密囑老者冒爲父。鬻身於谷子韶家。券成。私問老者曰：可使晨暮一歸乎。曰：不能也。五日一歸乎。曰：不能也。遂向隅而泣。淚如雨。其老者終釋然。不形於色。谷公異之。問其故。不答。固詰之。老者始吐其實。谷公歎曰：十齡童子。計乃出此。誠孝子也。受其券不仁。斬其值不義。乃焚券。倍值而歸之。踰時。黃孺子之孝名溢里巷。谷公曰：向者鬻身之事。今而後知非僞行也。孝於親者。有不昌其後乎。遂以孫



女妻之。是歲多飢匪。父夜守田禾。每出持農器隱於禾中。陰護之。適匪見拒。卽以農器助擊。匪驚逸。蓋父每戒不出。至是始知其夜必隨行也。歲丙子。母方胃痛。至人定。鄰不戒於火。冒火負母及弟出。父歸驚知其事。曰。賴有此兒。及谷氏來。嬪謂之曰。爲子婦。須得堂上歡心。知其所歡。豫圖之。知其所憂。豫防之。可矣。迨母歿。毀瘠盡禮。夜宿殯旁。囑家人不言。恐增乃父憂。如是者三年。殯旁枯樹生枝。人謂純孝所感。終母制後。不復入內。必與父同寢。及執父喪。如喪母時。每食必祭。而後食。遇忌辰。輒涕泣。里有事。親無狀者。召之傭工。見事死如



生若此。赧然曰。我等直不可為人矣。卒歸。能事其親。晚年捐貲鳩族人。修歷代祖墓。建宗祠。鄰里親族有饗飧不繼者。必以錢米周之。創興黃氏宗學。置義田十餘畝。亦舉鄉飲賓。謙若不敢自居。年七十四。偶不憚。怛化而逝。子三人。智烜。廩膳生。智蒸。智煥。增廣生。竝能世其學。

吳大本明經黃氏世孝傳

贊 醫父鬻身負母出火但知有親不知有我

曰 至性天成化及閭左稱以孝子誰云不可

清敕授儒林郎州同知借補山東泰安縣分縣諤哉府君

諱

千人 李家塔支十九世



先生諱千人字證孫主一先生六十自壽所云三兒九歲更玲瓏者也考授州同比選改補泰安丞十年而歸吳江周戴檉敘其甯野堂詩稿云明熹宗朝逆閹竊柄黃公忠端先公忠毅諱宗建前後抗疏同日殉身餘姚吳江相去六七百里子姓世世爲通門余生晚末不及見忠端公與先公立朝風格幸見忠端之子黎洲先生親炙而私淑之繼又見忠端之孫主一先生挹其言論丰采甚慰兩先生父子棄世隔三十年又獲見忠端之曾孫證孫於鄴下徐玉山之署嗚呼余不及見忠端然而獲見其子而孫而曾三世矣用是益想見忠端



與先公兩公同朝合志巖巖嶽嶽恍在天光雲影間證孫出  
詩示余見吐詞偉岸不阿世好是卽先人氣節也托意遠大  
預切民瘼是卽先人經濟也下筆風華獨殊凡響是卽先人  
文章也然則忠端三世緒餘雖於斯乎見而余所望於證孫  
者尙欲其力追先人之氣節經濟文章而身任之豈僅僅見  
之於詩而已哉

宗譜文苑傳

炳屋謹案公補缺時泰安州升府更設泰安縣遂爲丞耳  
贊遺獻之孫九歲瓏玲玉京謁選頭銜冰清

曰易州爲縣改同爲丞餐秀諸集有感而鳴



清敕贈修職郎嘉興府嘉善縣學訓導 例贈文林郎江蘇

海州沭陽縣知縣 贈文林郎廣東廣州府從化縣知

縣管村府君

諱

武萬

李家塔支二十世

公諱武萬字毅公號管村少居通德鄉之竹橋忠端公之元孫文孝黎洲先生之曾孫也祖棄疾公父文度公公甫就傅而父母俱已棄世依外家張舅氏子法公長娶施氏贅於其家後十年遷邑之西北隅官加衎儒而兼賈貲用稍給置饘粥薄田宅心恕而與人周戚串謀有無必應而不責其負族黨莫不交稱之曰善人也食指漸繁有不足之虞乾隆甲戌



冬遭回祿益困瘁使諸子分業以耕以讀出而橫耒外而就  
傅各得其宜生平最喜誦格言且爲人稱說之與人無爭與  
物無忤始不免有一二外侮之交訐後亦莫之敢侮此厚德  
所感也今子孫眾多賢而達者不乏人疊膺封誥爲善必  
昌豈虛語哉公生於康熙丁丑五月六日卒於乾隆己卯十  
月二十二日享年六十有三葬於東豐山之麓子五人長璧  
次琰奉祠生次璋乾隆丙子舉人借補嘉善訓導陞江蘇沭  
陽知縣次璘國學生次球以子璋 敕贈修職郎嘉善縣以  
教諭銜管訓導事配施氏 敕封八品太孺人以孫徵父



贈文林郎廣東廣州府從化縣知縣配氏施 贈七品

孺人孫十人曾孫二十人宗譜孝義傳

贊 癸子幼齡自鄉徙城年逾六甲家慶多丁

曰 縣延科第疊荷 恩綸純修厚德報及其身

清覃恩贈徵仕郎內閣中書銜 例贈文林郎候選知

縣拱圖府君諱壁李家塔支二十一世

府君諱壁字拱圖遺獻黎洲公之元孫管村贈公之長子也

著有西野吟窩稿以孫炳屋 贈徵仕郎內閣中書銜會

稽宗滌樓觀察稷辰序西野吟窩稿云黎洲歿後門祚衰微



而一脈儒風爲世壇坫代有名諸生騷雅淹博先生振拔膠庠不愧無雙之目同懷五人先生爲主器孝友性成撫育諸弟二老怡然好爲古詩胎息盛唐屏斥浮豔六朝綺麗之詞概不寓目焉樂道安貧不嗜榮利凡處世待人持身應務在不外一真字嘗夜行拾遺金立待移時失主尋至還之而歸鄉黨有爭者見先生至各自慙而退教人爲學以返求諸身爲第一義中歲遭祝融故居蕩然卜築城西置田若干畝日課耕耘曰使兒輩知稼穡艱難也立心真摯類如此故所爲詩亦不離一真字晚歲顏所居曰西野吟窩享年六十有



七配宋孺人閨門雍肅有梁孟風生子一徵謀能世其學哀

集遺詩為西野吟窩稿躬恥齋文鈔黃氏三世詩傳

贊 東浙忠裔懿渠世守南雷遺書徧觀燈右

曰 西野吟窩詩傳永久 北闕恩綸榮施身後


清乾隆丙子舉人 敕授文林郎江蘇海州沭陽縣知縣

敕贈文林郎廣東廣州府從化縣知縣 馳贈奉政大夫

兵部武選司員外郎大俞府君諱璋李家塔支二十一世

先生諱璋字穉圭號華咳晚號大俞居士管村贈公之中子

黎洲先生之元孫也先生性至孝事父母先意承志家貧晏





如也。天資穎悟，於經史百家靡不究覽。黎洲先生承忠端之傳，以風節行誼高天下。與弟晦、木澤、望兩先生一門競爽。當時比之金谿、三陸先生淵源家學，克稱濟美。年二十九登丙子鄉試，任嘉善教諭。乾隆壬辰，詔徵天下遺書，浙江設

採訪局，大吏選先生司其總。凡得書數千種，每書皆考其撰人爵里，疏其宗旨，輯總目若干卷，進呈以卓異陞江蘇沭陽知縣。蒞官訪求民隱，以興利除弊、抑強扶弱爲己任。稍暇則進士民而訓迪之，課試之。沭陽地窪下，多水災，報請賑卹兩次，發帑銀二十餘萬兩，潔已率吏民霑實惠。歲庚子



翠華南巡承辦水營盤不事張皇而事以集邑素難治公事  
旁午嘗有詩云五日在衙十日野一年作事百年心蓋紀實  
也辛丑去官歸里年纔五十四不復有出山意優游林下者  
二十有二年所著有大俞山房詩文集楊龜山年譜考證已  
刊行詩瀋刻識浙石略及校補宋元儒學案藏於家學案創  
稿於梨洲先生纔十之四五主一先生續纂之先生復補輯  
之享年七十有五配俞氏子三徵肅徵父徵質皆以科第世  
其家孫曾亦多蜚聲翼序云

宗譜  
列傳

贊 詔開四庫採輯是司符分百里勞瘁不辭



黃氏世德傳贊  
曰年逾服政泉石自怡書香繼起勿替引之

清敕授修職郎乾隆丁酉拔貢丙午副榜台州太平縣教諭

兩莊府君

諱徵肅李家塔支二十二世

先生諱徵肅字元恭號雨莊大俞公長子也天性孝友姿稟穎敏工詩文復善書法弱冠補博士弟子員名噪一時爲學使者王惺園先生所賞識充丁酉選拔貢生朝考一等歸班充四庫館謄錄在京時與搢紳先生及名士游聲望益隆無不願與訂交者茹古香尙書居家嘗語人曰吾於書法則畏雨莊於文章則畏平黼非虛語也議敘當得州判先生志



在進取改教職。選補瑞安縣。勸士子以績學勵行。士論歸之。  
丙午。由任所應鄉試。復中副車。未屆俸滿。丁俞孺人艱。服滿。  
需次者久之。時大俞公優游林下。日承庭訓。侍奉能得其歡。  
心。友愛諸弟。視諸姪皆如己子。與親友鄉黨周旋。悉以誠意。  
相周浹。性故謹言。呐然不出諸口。邑之人稱之曰。此長者也。  
當今而舉有道。舍先生其誰耶。後補太平教諭。其教士一如。  
在瑞安時。閱三載而卒於官。年六十有二。配馬孺人。享壽九。  
十有四子。二長坤。屋。後改簡堂。字瀛乙。廩膳生。學使潘芝軒。  
相國深器之。惜精舉子業而終老文場。僅得以歲貢就職。訓。



導平生色養盡歡馬太君得樂餘年以享大耄為難能也次

學屋國學生宗譜文苑傳

贊 鍾王筆陣伏鄭經腴一登拔萃再中副車

曰 司訓安固秉鐸橫湖望隆名重允矣醅儒

清賜進士出身 覃恩敕授文林郎廣東廣州府從化縣知

縣 馳贈奉直大夫戶部陝西司主事加一級 晉贈朝

議大夫戶部河南司員外郎加二級鶴石府君諱徵父李家

塔支二  
十二世

公諱徵父字仲治號平黼大俞公仲子也少穎悟讀書輒數



行下年十七補弟子員學使韓城王相國深器之文名藉甚  
每試必前茅己酉選拔旋中是科鄉舉相國朱文正謂之曰  
玉堂金馬中早爲君置一座矣春闈屢薦不售南巡時應  
召試者再又不得志遂循挑例選任瑞安學博然猶兩次與  
計吏偕未幾乞歸適葉氏壻領鄉薦己卯相邀北上竟成進  
士蓋是時年六十有四矣以卽用宰廣之從化阮芸臺制帥  
公舊識也知公異未嘗以屬吏遇從化與增城連界盜起增  
令報稱盜自從化來大吏不察遽委弁搜山闔邑倉皇懼不  
免且無以供應方伯程公含章歎曰從固羸邑黃君又廉吏



也。其何以堪。遂同巡道李公澐。各助廉千金。軍有所需。并飭將佐申嚴約束。兵弁以是不敢肆。每擒盜。至公必多方引免。十不留一。所活者以千計。督兵者不悅。公毅然曰。奈何以民命逞爾心耶。武士以公之獲於上也。亦不敢固爭。辛巳壬午。兩充同考官。得士爲最。解首一出其門。甫滿任。卽引疾歸。監司再三慰留。公固稱年衰不任事。蓋公功名之心。雖老不已。而於仕宦泊如也。故秉鐸十年。鳴琴三載。輒棄去不稍芥蒂。旣歸。杜門不預外事。掌教龍山。惟朔望院期。與邑侯一相見。外此。曾不以片紙投公門。戚友里黨。亦未有以非義干者。由



其清風亮節。取信於人者素也。天性孝友。少事親無間言。在  
瑞安時。伯兄雨莊公訃於太平任。公卽假歸。不遠千里也。晚  
號鶴石山人。嘗自營生壙於邑之後豐山。并撰墓誌銘之曰。  
卽以是爲予自述可也。平生所作古文詞。不自收拾。故付梓  
者。惟鶴石山房詩稿兩卷。詩續兩卷。卒於道光己丑。壽七十  
有四。宗譜  
列傳

贊 金馬玉堂預先置席鐸秉十年齡逾六秩

曰 賜餅綾紅分符綬墨鳧歸來優游泉石

清敕授修職郎嘉慶丙寅歲貢就訓導職遵 例改捐縣丞



分發江蘇歷署海州直隸州州判句容江甯山陽沭陽縣

丞菊圃府君

諱

徵質

李家塔支  
二十二世

菊圃府君諱徵哲字思睿改諱徵質號菊圃大俞先生之季子也早歲遊庠即廩於二十人之中伯仲二兄迭膺選拔伯兄即中副車仲兄旋登賢書大俞先生以府君為人精敏欲令專理家務而府君不願故頡頏文壇府君於二兄無多讓焉年未五十而貢就職訓導改捐縣丞候補江蘇歷署海州州判山陽句容沭陽等縣丞沭陽為大俞先生鳴琴之地先生離任數十年而府君復佐是邑當日舊交往往以得見府



君爲喜享年六十有七無疾終於泚陽丞署配洪孺人子三履屋邑增生敦屋早世安瀾廣東桂山司巡檢卒之日惟一僕在署府君預服朝衣臥於牀若先自知將死也噫異矣著有東籬采菊吟藏於家

宗譜詩文集小傳

贊 厥考鳴琴厥子佐理舊澤未湮新猷繼起

曰 至今泚人口碑稱美誰謂一官匏繫而已

清覃恩敕贈徵仕郎內閣中書銜 例贈文林郎候選知縣

淨齋府君

諱徵謀李家塔支二十二世

淨齋府君諱徵謀字慶貽號莖午晚顏所居曰淨齋因以自



號焉。遺獻梨洲公六世宗子。贈公拱圖府君之子也。太學生。著有淨齋百一稿行世。以子炳。敕贈徵仕郎內閣中書銜。會稽宗滌樓觀察稷辰序淨齋百一稿云。先生承忠孝一脈之傳。當門祚艱。晚之際。含辛茹苦。色養二人。克盡歡心。嘗作守儉說。言士人立品勵行。上不貽祖父羞。下不貽子孫累。皆自節儉始。故終身布衣糲食。視一毫非義。若將免焉。廣覽羣書。好古文詞。尤喜吟咏。嘗五鼓作詩。孜孜不倦。試輒不利。援例入國學。麤戰棘闈。屢薦不售。授徒數十年。以敦品立行勸弟子。多所成就。每晨必玩味儒先格言。傲袁了凡功過格。



日記所言行。考驗得失。暇則以古人懿槩。曉諭里黨。人多化之。與人交際。坦懷相示。胸無城府。或以非禮相加。亦不與較。由是遠近稱爲長者。道光庚子元月。疾革。謂家人曰。吾一生學喫虧。後嗣必有興者。遂口占一絕云。來從來處來。逝從逝處逝。此心還太空。此身還天地。吟畢而逝。蓋功深養到。性定神完。於生死一關。有處之裕如者。非凡人所能及也。享壽七十有八。晚年自刪其詩。百中存一。曰淨齋百一稿。元配施孺人。蚤世。生一子源。厚才質穎異。弱冠能詩。未娶而卒。繼配鄔孺人。有淑德。亦能詩。于歸後。曰詩非婦人所宜習也。遂廢吟。



咏絕口不言競病生一子炳屋克承家學續耆舊傳云公年  
逾五旬遇道者相之曰君長子不永年當更得子為惠迪之  
應間一年舉子炳屋而長子病甚鄔孺人勸割匿產為藥餌  
資百計醫治竟不瘳公訓子事事必示以禮法加以孺人內  
教同於嚴師故子姓行誼多篤實同治庚午子炳屋孫維瀚  
同登賢書識者謂公積善所致云

黃氏三世詩  
傳參宗譜

贊 儉以助廉公而守正德化鄉閭是亦為政

曰 天佑善人家延餘慶歿荷 龍章九京輝映

黃氏世德傳贊 終



竹橋黃氏誥敕

從來家乘必載

恩綸所以彰

君貺揚祖德勛後昆光譜牒也吾族

誥敕迭經兵燹宗譜所載不過十之一二戊寅修譜司事者

盡行削之遂并此碩果不存矣今於舊譜搜輯若干及

覃恩新頒若干彙爲一卷列入世德錄中庶使後人有所觀

感而瞻仰先型者并知

帝澤之浩蕩焉嗣後再修族譜當敬登諸卷首矣炳屋謹識



竹橋黃氏言東

九世諱永昊配徐氏以子韶

古路支

奉

天承運

皇帝勅曰朝廷簡任才能以勵夫臣之忠因推廣恩典以  
遂夫子之孝此古今之定制而激勸之良法也爾黃永  
昊廼南京大理寺左寺左評事韶之父惇行善道延譽  
鄉邦訓子登科居官清慎推原所自用錫褒榮茲特封  
爾為文林郎南京大理寺左寺左評事服此茂恩益縣

壽祉





勅曰母以訓子爲慈子以顯親爲孝肆朝廷推恩臣下必  
彰夫訓子之勞而遂其顯親之願焉爾徐氏廼南京大  
理寺左寺左評事韶之母慈惠之善著於閨門有子登  
庸由爾之訓茲特封爾爲孺人服此茂恩永綏祿養

勅命

成化十二年九月十六日

之寶




竹橋黃氏詩集

十世諱韶 成化己丑進士 配朱氏

奉

天承運

皇帝勅曰刑者民命所係古帝先王莫不慎之今天下之  
刑皆平於大理其審刑之任必得平恕存心燭於下情  
者然後稱焉爾南京大理寺左寺左評事黃韶發身賢  
科擢居是職祥刑明允操履清勤宜錫寵恩用昭國典  
是用進爾階文林郎錫之勅命以為爾榮爾尚益勵公  
明務雪冤抑以副朕慎刑之意爾惟欽哉





勅曰朝廷推恩羣臣而必及其配者所以示從夫之義彰  
內助之勤也南京大理寺左寺左評事黃韶之妻朱氏  
克勤婦道善相其夫夫既顯榮爾宜偕貴茲特封爲孺  
人服此榮恩永光閨闈

勅命

成化十二年九月十六日

之寶




二十世諱武萬配施氏以子璋

李家塔支

奉

天承運

皇帝制曰任使需才稱職志在官之美馳驅奏效報功賢  
錫類之仁爾黃武萬廼浙江嘉興府嘉善縣以教諭銜  
管訓導事黃璋之父雅尚素風長迎善氣弓冶克承乎  
庭訓箕裘不裕平家聲茲以覃恩馳贈爾爲修職郎浙  
江嘉興府嘉善縣以教諭銜管訓導事錫之勅命於戲  
肇顯揚之盛事國典非私酬燕翼之深情臣心彌勵





制曰奉職無愆懋著勤勞之績致身有自宜酬鞠育之恩  
爾施氏廼浙江嘉興府嘉善縣以教諭銜管訓導事黃  
璋之母淑範宜家令儀昌後早相夫而教子俾移孝以  
作忠茲以覃恩賚封爾爲八品太孺人於戲賁象服之  
端嚴誕膺鉅典錫龍章之渙汗用表榮施

勅命

乾隆三十六年十一月二十五日

之寶




二十世諱武萬配施氏以孫徵父

奉

天承運

皇帝制曰考績報循良之最用獎臣勞推恩溯積累之遺  
載揚祖澤爾原贈浙江嘉善縣以教諭銜管訓導事黃  
武萬廼廣東廣州府從化縣知縣黃徵父之祖父錫光  
有慶樹德務滋嗣清白之芳聲澤留再世衍弓裘之令  
緒祐篤一堂茲以覃恩賚爾爲文林郎廣東廣州府  
從化縣知縣錫之勅命於戲聿修念祖膺茂典而益勵





新猷有穀貽孫發幽光而不彰潛德

制曰冊府酬庸聿著人臣之懋績德門輯慶式昭大母之  
芳徽爾施氏迺廣東廣州府從化縣知縣黃徵父之祖  
母箴誠揚芬珩璜表德職勤內助宜家久著其賢聲澤  
裕後昆錫類式承乎嘉命茲以覃恩馳贈爾爲孺人於  
戲播徽音于彤管壺範彌光膺異數于紫泥天庥允劭

勅命

嘉慶二十五年八月二十七日

之寶



二十一世諱璧配宋氏以孫炳屋

李家塔支

奉

二十五年八月二十日

天承運

命

皇帝制曰寵渥朝章錫類不遺於一命祥開家慶賚恩爰  
及夫重闈爾黃璧廼恩賞內閣中書銜舉人黃炳屋之  
祖父弓裘衍澤瓜瓞縣庠作述相承再世式彰其祖武  
淵源有自一經早裕夫孫謀茲以覃恩賚贈爾爲徵仕  
郎內閣中書銜錫之敕命於戲舊德維昭用廣顯揚之  
志新綸特賁允增泉壤之光





制曰禮由義起宏孝治於中閨命自天申賁榮施於大母  
爾宋氏廼恩賞內閣中書銜舉人黃炳屋之祖母德懋  
蘭儀光生槐里珩璜作則式垂淑慎之型荇藻流芬不  
振光昌之緒茲以覃恩馳贈爾爲孺人於戲鸞書煥彩  
合彤史以揚休象服增輝荷雲章而錫慶

敕命

光緒拾伍年伍月拾肆日

之寶




竹橋黃氏譜

二十一世諱璋 乾隆丙子舉人 配俞氏以子徵父

奉

天承運

皇帝制曰求治在親民之吏端重循良教忠勵資敬之忱  
聿隆褒獎爾原任江蘇沭陽縣知縣黃璋廼廣東廣州  
府從化縣知縣黃徵父之父禔躬淳厚垂訓端嚴業可  
開先式穀乃宣猷之本澤堪啟後貽謀裕作牧之方茲  
以覃恩贈爾為文林郎廣東廣州府從化縣知縣錫之  
勅命於戲克承清白之風嘉茲報政用慰顯揚之志昭





乃遺謨

制曰朝廷重民社之司功推循吏臣子勵冰淵之操教本  
慈幃爾俞氏迺廣東廣州府從化縣知縣黃徵父之母  
淑慎其儀柔嘉維則宣訓詞於朝夕不忘育子之勤集  
慶澤於門閭式被自天之寵茲以覃恩贈爾爲孺人於  
戲仰酬顧復之恩勉思撫字載煥絲綸之色允賁幽潛

勅命

嘉慶二十五年八月二十七日

之寶




二十一世諱璋配俞氏以外孫張福屋

奉二十五年八月二十日


天承運

皇帝制曰功隆賞懋式宏錫類之仁積厚光流兼廣外家  
之澤榮名上逮義問彌彰爾原任江蘇沭陽縣知縣黃  
璋廼兵部武選司員外郎加一級今陞郎中總辦司事  
張福屋之外祖父出自有基後來稱秀宅鍾華胄光閭  
澤衍縹緗慶集繁禧匡國名高黼黻興宗兆叶縻爵階  
崇茲以覃恩馳贈爾爲奉政大夫兵部武選司員外郎





加一級錫之誥命於戲良臣懋績既增舊德之光外氏  
蒙恩丕煥新綸之采式承庥渥庶慰旌揚



制曰職崇朝宗嘉丕績於良臣澤沛龍章推鴻慈於外氏  
重闈錫慶累世承庥爾俞氏廼兵部武選司員外郎加  
一級今陞郎中總辦司事張福壘之外祖母軌儀嫺雅  
風範淑嘉主饋宜家啟後來之俊秀延庥相宅邀三錫  
之榮光啟佑有原恩施宜沛茲以覃恩賚贈爾爲宜人  
於戲芳規未邈尙貽昌大於方來寵賚仍加庶保昭融  
於罔斁用酬懿訓祇荷隆施



命 誥

道光十五年十月初十日

寶

二十二世諱徵父配余氏以外孫翁學濬

贈奉直大夫戶部陝西司主事加二級


道光二十五年十月十五日

又以外孫翁學涵

贈朝議大夫戶部河南司員外郎加二級

同治四年九月二十八日

誥詞並與此同故不錄





二十二世諱徵父

嘉慶己卯進士

配余氏

奉

天承運

黃

皇帝制曰分符百里必遴出宰之材報最三年爰重懋官  
之典爾廣東廣州府從化縣知縣黃徵父雅擅才能克  
宣慈惠撫綏有要常深疾痛在己之心懷保無窮不忘  
顧復斯民之責茲以覃恩授爾爲文林郎錫之勅命於  
戲前勞已著用袞製錦之能來軫方適益勵飲冰之操  
制曰良臣宣力於外効厥勤勞賢媛襄職於中膺茲寵錫



爾余氏廼廣東廣州府從化縣知縣黃徵父之妻終溫  
且惠既靜而專綦縞從夫克贊素絲之節蘋蘩主饋爰  
流彤管之輝茲以覃恩封爾爲孺人於戲敬爾有官著  
肅雍而並美職思其內當黽勉以同心

勅命

嘉慶二十五年十月二十五日

大承 之 寶

二十二世 續燈火

嘉慶二十五年十月二十五日 爾余氏





二十二世諱徵謀配施氏以子炳廔

奉

天承運

皇帝制曰委贊策名資敬有作忠之義推恩逮下馳榮溥

錫類之施爾黃徵謀廼恩賞內閣中書銜舉人黃炳廔

之父善足開先謀能裕後衍弓裘之世業令緒相承表

勤儉之家風義方夙著茲以覃恩贈爾為徵仕郎內閣

中書銜錫之敕命於戲殊恩特沛用彰孝治於班聯慶

典新膺式表幽光於泉壤





制曰百職懍在公之義懋著臣勞九重崇教孝之模式彰

母德爾施氏鄒廼恩賞內閣中書銜舉人黃炳厘之母相

夫以順育子維勤丙夜鳴機克著中閨之範北堂晝荻

用成喆嗣之名茲以覃恩贈爾為孺人於戲育寵錫於


黜衡新承渥典沛恩綸於彤管彌著芳徽

皇命

光緒拾伍年伍月拾肆日

奉之寶

二十二冊





新建竹橋黃氏忠獻義塾記

吾族舊有義學。自乾隆間族祖箭南公作宰慈利。創立斯舉。出資置產。培文恤老。交外房公正司事。遵行弗替。歷有年矣。

然鄉會及小試有贈費。而延師訓蒙之事未行焉。舊義學現議延師訓

蒙以明歲辛卯爲始孤老殘疾有助費。而老婦無依者弗及焉。施惠在

族人而義渡等事未舉焉。百數十年來未有推廣其事者。今

乃得之於錫慶上舍生。鈞錫慶與炳同爲文孝公。曩孫行早

歲貿易姑蘇。垂數十年。敦崇節儉。薄積餘貲。慨然欲繼族祖之志。思廣其所未備。以己貲建忠獻義塾於官埭浦之旁。助



田百畝。延師訓蒙。使幼童之無力就學者。亦得沾詩書之澤。且於族內之老婦無依者。月有膳資。不使凍餒。官埭爲慈餘。往來通衢。橋圯已久。濟渡維艱。錫慶設義渡。以便行旅。塾內設忠端公神位於中座。遺獻主一兩公左右配之。春秋享祀。歲以爲常。蓋義塾地不及二分。係忠端公祠舊基。自公祠遷入南城。遂爲廢地。而忠端公五子最著者。遺獻公。遺獻公三子最著者。主一公。故公議。援先聖先師之例。以三公爲義塾之先正。亦自錫慶上推之。爲一脈云。一切經費。取給於百畝生息。而司出納者。仍從箭南公舊例。專派族內公正之人。挨



年輪值本房不得尸其事意在避嫌云爾方錫慶之議斯舉也邀集族人商定章程公立議據炳於宗祠爲宗士於本房忝居長矣故得與其議迄今舉行兩載稟縣通詳各憲立案以垂永久并囑炳記其梗概以爲久遠奉行之準竊思善舉莫難於創始尤莫難於守成炳嘉錫慶之不私所有能擴前人之志廣惠澤於無窮也尤望後之司事者心錫慶之心以實心行實事俾族中族外之人咸沾實惠也若夫更增阡陌式廓規模備今日之所未周行異日之所難緩是尤在後人之有志自立者矣光緒庚寅秋分前三日炳屋謹記時年七



十有六

案錫慶創建義塾助田百畝為祭祖培文恤寡濟渡等費

內六十畝係新置之產餘四十畝則康熙間汪學使所助

文孝祀田為仲房出質族內乾隆季年孟季兩房有力者

贖歸季房雪汀公贖廿二畝奇孟房穉圭清遠兩公贖十四畝奇事詳梨洲公年譜各入於私今

錫慶以己貲向其後人買入義塾價視時值有不願賣者

易以他田其戶名仍係文孝公祀以奉憲永不易戶故也

又四畝本係文孝祀輪年值祭之產錫慶以己田四畝八

分易之倣別立戶名之例昔炳助絲字號田六畝於祭內立黃梨洲公祭戶於西北一里



另設黃遺獻公祭戶於得三都三里俾義田與公祭不致

雜糅云今錄義塾田畝字號於後號碼三位者首位為百四位者首位為千也

作八號田二畝六分三七五 號田一畝正

田二畝七分 田四畝二分〇三毫

田一畝七分 田二畝九分

田二畝〇九釐四毫 田一畝五分七釐五

田二畝三分 田九分五釐

田九分一釐五毫 田五分八釐四毫

田八分九釐六毫 田一畝九分五釐



作𠄎號田一畝○四釐

𠄎號田二畝○七釐六毫

𠄎 田一畝二分六釐五

𠄎 田六分六釐二毫五

𠄎 田二畝一分七釐

𠄎 田一畝五分四釐四

𠄎 田三畝一分三七五

𠄎 田一畝五分四釐二

𠄎 田一畝七分九釐

𠄎 田四分

𠄎 田三分五釐

𠄎 田二畝二分

𠄎 田二畝九分四釐

𠄎 田一畝七分

𠄎 田一畝七分九釐九

𠄎 田四畝二分

𠄎 田二分一釐

德𠄎號田五畝一分九○二





以上田畝得三都三里忠獻義塾戶納糧計六十畝弱

作收號田一畝八分

卍號田一畝九分八七五

卍 田二畝二分三釐七

卍 田一畝八分三釐

卍 田一畝一分三釐

卍 田一畝〇七釐

卍 田五分四釐二毫

卍 田一畝三分五釐

卍 田三分五釐七毫

卍 田三畝一分二釐

卍 田四畝四分

卍 田三畝八分

卍 田一畝九分八釐八

卍 田一畝一分五釐五

卍 田五分九釐二毫

卍 田八分八釐五毫



作悞號田四分五釐

悞號田一畝正

悞田一畝九分五釐

悞田二畝二分四釐

悞田一畝四分九釐

悞田二畝六分五釐四

悞田三畝九分九釐

以上田畝得三都三里黃文孝祀戶納糧計卅一畝奇

其田一百畝有奇

計地畝一類八長九釐九  
計地畝一類八長八寸正  
以上田兩得三都三里忠烈義墓可憐蘇樟六十題額



